

Međunarodne organizacije na sastanku u Trebinju naglasile potrebu za ekonomskom reformom i učvršćivanjem vladavine prava

Danas su šefovi međunarodnih organizacija koje imaju sjedište u Mostaru održali radni sastanak u Trebinju. Sastankom je predsjedavao Zamjenik Visokog predstavnika i šef Ureda OHR-a Jug Jean-Pierre Bercot, a prisustvovali su mu komandant Višenacionalne brigade Jugoistok, general Chiarini, šef UNHCR-ovog ureda u Mostaru, Mohammed Karimul Huq, zamjenik šefa Regionalnog ureda OSCE-a, Dieter Leonhard, šef Ureda Evropske komisije u Mostaru, Murray McCullough, i glavni kolokator Policijske misije Evropske unije za područje Trebinja, Norbert Wieland.

Šefovi navedenih organizacija razgovarali su o Izvještaju posebnog revizora o Elektroprivredi RS-a, koji je otkrio sistematsko pljačkanje građana od strane onih koji građanima trebaju služiti. Ovo je doprinijelo teškoj ekonomskoj situaciji u istočnoj Republici Srpskoj te ukazuje na hitnost ekonomske reforme i uspostavljanja vladavine prava. Ekonomski rast može se postići jedino ako je rukovođenje komunalnim poslovima transparentno i ako se preduzmu sistematični napor u borbi protiv korupcije. Bez ulaganja i reda u privatizaciji, ova će regija u ekonomskom smislu biti marginalizovana, usprkos svom strateškom položaju i usprkos napretku koji je do sada ostvaren u prelazu na tržišnu ekonomiju.

Šefovi su izrazili svoju zabrinutost sigurnosnim incidentima i vandalističkim aktima koji su se nedavno dogodili na području

trebinjske regije. Čelnici lokalne zajednice osudili su neke od ovih djela. Ono što je sada potrebno je intenzivna reakcija lokalne policije i pravosuđa kako bi se obnovilo povjerenje među građanima i osiguralo mirno i tolerantno okruženje.

Šefovi su pozvali vlasti na području istočne Hercegovine da borbu protiv organizovanog kriminala učine svojim glavnim prioritetom. U tom pogledu, šefovi pomenutih organizacija su naglasili potrebu za većom saradnjom unutar ove regije, kao i za većom međuregionalnom saradnjom.

Međunarodne će organizacije nastaviti pomno pratiti situaciju u Trebinju i istočnoj Hercegovini te će i nadalje pomagati provođenje nužnih reformi.